

Shikamaneni! Shikamaneni!

Na kwa sababu ya kuongezeka maasi, upendo wa wengi utapoa. Lakini mwenye kuvumilia bata mwisho, ndiye atakayeokoka—Mathayo 24:12, 13.

Mungu amewachagua watu katika siku hizi za mwisho ambao amewafanya kuwa bohari la sheria Yake na watu hawa daima watakuwa na wajibu usiopendwa wa kutimiza. “Nayajua matendo yako, na taabu yako, na subira yako, na ya kuwa huwezi kuchukuliana na watu wabaya, tena umewajaribu wale wajiitao mitume, nao sio, ukawaona kuwa waongo; tena ulikuwa na subira na kuvumilia kwa ajili ya jina langu, wala hukuchoka.” Itahitaji bidii nyingi na mapambano ya mara kwa mara ili kuondoa uovu kutoka kwenye makanisa yetu. Ni lazima kuwe na nidhamu kali, isiyo na upendeleo inayotekelezwa; kwa maana wengine walio na mfano wa dini watatafuta kudhoofisha imani ya wengine na watafanya kazi kwa siri ili kujiinua.

Bwana Yesu pale juu ya Mlima wa Mizeituni, alisema wazi kwamba “kwa sababu ya kuongezeka maasi, upendo wa wengi utapoa.” Anazungumza na watu ambao wameasi kutoka kwenye hali ya juu ya kiroho. Hebu maneno hayo yatufikie vizuri, yakiwa na nguvu ichunguzayo mioyo. Iko wapi ibada yenye ari kwa Mungu, ambayo inalingana na ukuu wa ukweli ambao tunadai kuuamini? Kuupenda ulimwengu, kuipenda dhambi kipenzi, kumeuondoa moyo katika kupenda maombi na tafakari ya mambo matakatifu. Mzunguko rasmi wa huduma za kidini unaendelea; lakini upendo wa Yesu uko wapi? Hali ya kiroho inakufa. Je! Ni huu ugoigoi, uharibifu huu wa kuhuzunisha, upaswao kudumishwa? Je! Nuru ya ukweli itayumbayumba na kuzimika gizani kwa sababu haijajazwa na mafuta ya neema? ...

Kujisifu na kujitosheleza vinaua maisha ya kiroho. Nafsi inainuliwa juu; nafsi inatukuzwa. Laiti nafsi ingekufa! “Ninakufa kila siku,” alisema mtume Paulo. Wakati huku kujitosheleza kwa kiburi na kujisifu na kujiona kuwa mwadilifu kwa kuridhika kunapoingia ndani ya nafsi, hakuna nafasi kwa ajili ya Yesu. Anapewa nafasi duni, wakati nafsi inainuliwa juu sana na kulijaza hekalu la roho. Hii ndiyo sababu Bwana anafanya kidogo sana kwa ajili yetu. Kama Bwana angefanya kwa kufuata juhudi zetu, mtendaji huyo angejitwalia utukufu wote kwa sababu ya werevu, hekima, uwezo wake mwenyewe na angejisifu mwenyewe kama walivyofanya Mafarisayo: “Mimi nafunga mara mbili kwa juma; hutoa zaka katika mapato yangu yote.” Pale nafsi itakapofichwa ndani ya Kristo, haitainuliwa juu....

Ni pale tu tutakapotimiza kwa uangalifu mpango wa Bwana bila kuweka alama na utambulisho wetu katika kazi hiyo ndipo tunapokuwa tunaifanya kwa ufanisi na kwa ulinganifu. “Shikamaneni,” alisema malaika, “Shikamaneni”
(Testimonies for the Church 5:538, 539).